

清·吳蕙 撰

靜香樓詩草二卷

清道光十二年(1832)刻本

吳蕙

吳蕙(1777—1832)，字靜香，吳縣(今屬江蘇蘇州)人。歸陽湖蔣錫琳，夫婦相得，唱和度日。有《靜香樓詩草》二卷，其子爲之刊刻面世，卷前有諸家題詞。

靜香樓詩

草

道光壬辰
孟秋鐫

序

原夫崇臺覆燕北音始登塗山候人南聲是肇詩
三百篇首列房中之樂焉他如元雲觴室之章素
紈秋風之怨靡不騰英綈縠播譽蘭簪溪流雲母
而聲清山至蛾眉而秀絕是以靜女彤管珍逾璣
都之筆壽人笙磬和於雍門之琴而或匿影求聲
窳中廊外資潤色於齊案丐膏馥於畫縻仙厨乃
支離代庖雲錦非天孫自製否則風弦適赴空籟
偶傳單跗逞芳無四照之美片羽競賞乏垂天之
觀頌獻椒花未若白麝奇木之對詩成紫石終殊

芝房寶鼎之歌復有題蟬綺語漱玉靡詞竹廟迎
郎橘林贈客曼音聳聽狎謔弗莊夫宋玉賦色賢
士薄而不為陶令閒情選樓屏而不錄矧託體香
篝脂盞者耶凡此者誠不若龍杼調梭鶯漿議食
不譚藝事轉無刺譏矣惟靜香夫人淑慎閨儀幽
貞瓊範家承通德本有賜書身是璇星尤工織句
綴珍珠為奇字恥釵鈿為辱金固已敲簪諷簡和
粉書筠左芬工詩太沖俯首君徽善賦明遠傾心
矣洎乎歸我秀峯先生也鴻朗同窺鰈鱗必儷一
雙銀管分題而百和香生十樣蠻牋聯句而並頭

花發時則雲璈春宴霧幌秋吟寫韻樓高催詩燭
短落筆而烟霞在手開窗而山色橫眉宜乎何曾
入門下拜杜羔服婦如師也夫珠皋射雉深憐言
笑之難雪苑吟風不無天壤之感豈期兩美遂譜
雙聲快此吟朋是為嘉耦而況膝前則慈爽多才
掌上則憲昭最慧子婦纂大家之集婢妾通宣文
之經溫柔之教漸染深矣其間隨宦馬沙再遊毘
陵積數十年之久雖復手區心計事比焚絲暇即
苦吟未嘗綴學三商篝火一卷丹黃以掃眉之才
人等燁掌之瘁士所以著作之富比於脯削屬詞

之美精於鏐鏐也又復宅衷德象刻絕淫哇靈源
濬其蘭言古芬發其藻績黼黻在御而衷相不朝
咸莖升庭而箏琶廢響此又非子夜四時丁孃十
索柳梢待月蘭蕙歸春所可同年語也且今之鈔
療吾知之矣數河間之錢握已清之算鼓湘靈之
瑟飾孫壽之妝投玉女之壺賭秦盈之韞亦以房
璫事瑣誰為訾議哉而迺標舉淵雲講求律切斯
已竒矣復能吞曹劉壓元白烏闌累寸副墨盈箱
洵巾幗之偉才詞壇之鉅觀也詩凡若干卷古今
體詩凡若干首是宜書之綠字覆以緗囊琅玕瑁

之籤貯琉璃之匣將使象飾勿華翬褊屏貴金馬
之英避席蘭臺之彥承風僕也得觀黃絹之辭盟
薔薇而十讀敢效玉臺之序壽茗琬於千秋

道光甲申春仲陽湖趙申嘉拜序

[illegible]

跋

吳下人文之盛莫如蔣氏駢珠壘玉綽有王謝家
風雖鏡臺釵閣間多以吟詠為事甲戌初冬魯南
茂才以其母夫人所著靜香樓詩藁見示詞婉指
約無戾方家五律如登樓云樹宿知旋鳥溪橫不
繫舟苦雨云花徑苔侵屐琴窗雨潤絃寒鴉云幾
行斜照澹一帶暮雲橫夜聞江風云聲兼波浪湧
氣接水天寬七律如婢去云鑪因香燼間思汝硯
為塵侵誤喚渠春陰云風流杜牧傷春病放達劉
伶中酒癡遊錢氏息園登妙嚴臺云三月鶯花新

翰墨六朝金粉。舊山河。士絕如消夏。云數竿修竹。
如人意。隨月橫斜。欲上衣清明。日口占云。惆悵踏
青好時節。野棠梨外雨如烟。新月云。最是蟾宮仙
筆巧。寫來留與晚妝人。皆有神韻流盪楮墨之外。
聞夫人隨宦馬沙學舍時。與秀峯外翰分箋唱和。
吟唔聲達戶外。至今士人猶豔稱之。蓋近日閨媛
中不多得也。予為之采入小學庵詩話。青浦邵堂
敬讀并識。

題詞

元和九世楠藹谷

重疊花箋寫好詩清詞麗句必兼之頻揩老眼看
新藁愧我難為一字師

玉釵金釧不關渠別有心情只愛書每到夜分勤
課讀不辭辛苦惜三餘

詩壇今日賸隨園採取瓊瑤不厭繁只恐別裁留
偽體狂言反道是莊言

一卷新詩味百回金閨也有揆天才誰知制義能
兼擅亦自王錢門戶來

吳縣高翔麟紱堂

我識蔣詡久久欽道韞名前身曾跨鳳此卷已餘
鯖體薄羣筭豔韻高太古清由來天上宿織女近
奎明

百字令

長洲王鳳韶南垞

江城春早伴暗香疏影梅花清夢一卷新詩傑獻
詠何事吟窗呵凍細雨論文殘鐙說劒判取流年
送湘簾捲處鸚鵡闌邊巧哢料得墨漬麝丸鑪
薰鳧藻欲繡曾中鳳一笑拈花花解語合是天衣
無縫翡翠樓頭珊瑚架底瘦沈東陽共女牆霜冷

試問閒堦鶴俸

吳縣吳周鈴竹軒

深阻江雲見面難
歸航握手有餘歡
腰肢瘦損吟懷健
借月支風墨幾丸

重譚立雪渺前塵
絳帳留題墨尚新
一樣辦香麈供奉愧無妙筆繼傳薪

堦下欣看玉樹聯
纔騎竹馬解題箋

大甥已能詩從知

闡訓符庭訓不獨詞華咏絮妍

吳縣張茂勲石樵

圖成花萼記曾諳

前題竹軒雲亭華萼聯吟圖

詠絮還教道韞

參他日聯吟應合集一門風雅擅江南
年少聲名員半千夫君才調最堪憐遙知官閣相
隨唱接迹風人第一篇

元和顧震蒼竹

簾影茶香憶後堂官閒却為和詩忙江頭花草皆
詞料收拾才華貯錦囊

篋中遊草抵瓊英端合焚香仔細評有福不妨詩
更好天生富貴得才名

吳縣范華緬芸

楓江西去遠塵市西津一帶饒烟水延陵門第重

三吳產得名姝似掌珠名姝窈窕神仙屬眉寫春
山黛橫綠格仿簪花纖指柔吟成詠絮闌干曲簪
花詠絮得親憐選壻開屏有夙緣鸞鏡定情纔弱
冠鳳樓却扇正芳年青廬繚繞麝香薰讀畫彈琴
遠俗氛不用解圍施步障但聞晏起惜朝曛想見
雞鳴同戒旦梁孟風高常舉案中饋修嚴每讌賓
奩臺拂拭還揮翰竭來隨壻宦江城渺渺湖波雙
槳行雲水衝颿添畫意江山放眼暢吟情譚經自
擁皋比坐後堂亦隔紗幮課桃李新陰繞院栽絳
帷喜得宣文佐絃詩官閣幾星霜讀禮追隨返故

鄉正是春鶯初出谷清聲雛鳳擷芹香從來豔福
三生錄清才閨閣應推獨同儕壇坫漫稱雄一見
相如應屈服

霓裳中序第一

吳縣陳彬華小松

楓江王謝宅詠絮吟椒香草拾巧擅生花妙筆恰
句麗金荃豔分瑤席玉臺譜集美元卿酬唱芳
粉奩外新詩舊稿寫就簪花格 昔日馬沙留別
想官舍研螺翠滴歸帆遙認岫色有兩點金焦海
門空闊吟懷添翰墨都裛入珊瑚卷帙消閒甚劉
綱夫婦清絕耽詩癖

嘉定陸 珣卯君

停鍼不語對筭枝重疊花箋配色絲怪底夫君才
調好卅年閨閣有餘師

不櫛依然進士才長吟花下問新栽滿庭蘭玉蜚
聲早半自班昭授讀來

三徑元卿寄綠篁分題酬唱韻琅琅年來我是羊
求侶可許攜詩拜後堂

雲間女史王崑藻綺思

葭草喜締隔音塵

予子婦即君之猶女

秋水伊人思最深此

夜挑鐙欣展卷一編冰雪寫蘭襟

不矜紈綺擅高懷投我新詩見妙才一笑回頭呼
子婦買絲先令繡君來

內則遺風勗女嬭

卷中有勗女詩

諄諄姆教美無倫于歸

聽徧誇佳婦羨殺閨房有替人

頌椒賦茗句都諳講席餘閒唱和耽他日河陽花
滿縣絃歌化本自周南

靜香樓詩草卷上

吳門 吳 蕙 靜香

月中桂

寄跡雲程有路通
春秋長蔭月輪空
香浮玉宇高
寒處枝贈文人筆
墨中常傍白榆依
碧漢不隨黃
葉隕西風
涼宵悵望寥天迴
一道晴霞化彩虹

白菊

雪為肌骨玉為胎
一種秋芳着意裁
把筆吟香慚
未稱寫花還待月
明來

即目

綺疏窗綠日華紅寫出霜天景最工
衰草猶青因氣暖寒花競秀賴晴烘
臨風鳥語喧簾外返照松陰入鏡中
獨立閒階人意靜一繩新雁沒遙空

山館晚成

日斜西嶺亂烟霞松影搖窓黯碧紗
院靜香消無箇事吟餘掩卷自烹茶

家園偶涉

融風麗日漸暄妍芳景園林二月天
枝上嬌鶯聲學囀谿頭新柳翠生烟
侵裾草色芊芊碧映水梅花朵朵圓
靜裏怡神春覺永低徊小閣擘吟箋

繡衣有感

日向西窗課女紅
絲絲金縷費鍼功
慙無德可章
文繡貽笑風人服不衷

吟香書屋偶成

碧羅天外晚霞晴
幾縷茶烟小院清
簾卷靜餘涼
欲透滿階霜葉起秋聲

東籬菊吐一枝黃
翠檻風來澹澹香
深感多情秋
夜月移將清影到書堂

冬閨漫興

院門深掩夕陽斜
睡鴨爐烟護碧紗
人坐小樓剛

罷繡漫呵凍筆賦梅花

題扇頭畫梅

誰將彩筆寫寒枝
淡雅丰神白玉姿
隨手卷舒春色好
暗香疏影動搖時

疏窓

疏窗淡燄伴黃昏
瑟瑟風簾漏雨痕
龍腦香殘金獸冷
鳳團茶注玉壺溫
敢忘刀尺循閨職
難負琴書繫性根
幾度沈吟貪夜永
漫呼小婢掩重門

春日雜詩

幾日春陰晝掩扉
今朝簾捲蜨雙飛
凭闌閒立東

風裏花霧吹來香滿衣

空谷春深蕙草香燕泥點點落雕梁不知景色濃
如許瞥見花開到海棠

小樓昨夜雨廉纖向曉餘寒半臂添閒倚鏡屏人
寂寂最撩春恨絮穿簾

枝頭愁聽雨三禽花落門前一寸深斜日林亭春
欲晚芊芊草色玉堦侵

小齋待月

愛月遲眠慣徘徊待月廊坐深隨燼燭夜永細添
香光起星無點輝分座欲涼微微松際露不覺滿

衣裳

柳絮

南飛北舞欲何之
漂泊江南三月時
點硯似來邀好句
因風又去惹游絲
已添別恨飄無定
尚有餘情落每遲
莫道兒家太輕薄
花開何處不空枝

送春

九十韶光轉眼更
留春無計送春行
明知隔歲原重到
怎奈臨歧總不情
小別風華裁短句
興懷花鳥憶前盟
憑闌惆悵斜陽晚
滿徑苔痕護落英

榆錢

榆莢青青點地圓
買書換竹兩無緣
不知雨後來
深院可當金閨夜
卜錢

梅雨同竹軒大弟作

嗁鳩何事不呼晴
愁聽空堦滴雨聲
野鳥却來檐際宿
癡雲疑在戶旁生
窗侵濕氣開書重
人怯梅寒襲
葛輕寂寂小庭扉
半掩苔陰竹徑有餘清

玉堦怨

西宮白玉堦堦前
照明月年年春苔痕
但見珠履跡

長門怨

飛
清絕深宮晚無言向夕暉忽驚秋信早一葉下堦

乞巧

一鉤新月隱銀河聞道雙星此夕過女伴樓頭爭
乞巧不知得巧阿誰多

登樓

乘興晚登樓憑高接素秋雨餘斜日澹天迴暮雲
收樹宿知旋鳥溪橫不繫舟山光如潑翠添得小
窗幽

花月吟效連珠體

拜月花階下花陰月半斜夜深花伴月人靜月移
花月映花情好花含月色華吟成問花月花月夢
魂賒

咏白桃花

漫隨紅粉侍東皇欲了塵緣出錦坊對月無言留
素影臨風欲笑傲時妝天台雲白疑無路玉洞花
開尚有霜寄語華林七百樹輸他本色占春光

虞美人

美人一別楚江愁賸有紅芳姓字留帶雨含顰花
欲淚怨深猶泣故宮秋

消夏雜詩

桐陰滿院捲簾遲短榻茶烟靜對時閒與小姑分
勝負一枰松影細敲棋

綺閣香消午夢餘閒窓睡起意如如最憐竹徑清
于水時有風來替展書

柳外新蟬送落暉荷香清暑晚涼歸數竿脩竹如
人意隨月橫斜欲上衣

銀河耿耿漏聲長沈李浮瓜一味涼夜景將闌人
語靜兩三螢火落東牆

山陰李松雲先生以梅花書屋賦黃梅詩索

和敬步原韻奉呈

邀得東風入臘時
素心人有歲寒期
甜香似與詩情洽
冷韻難教蜨夢知
漫調閨中塗半額
也宜竹外亞新枝
饒他萼綠羣仙品
裊點韶華已覺遲
吳下黃梅妙句傳
幾枝初拆夕陽天
檀心早透春風信
磬口曾參老佛禪
漠漠淡香含夜月
疏疏冷蕊帶寒烟
朝來瓊座添芳馥
雅合書窓伴謫仙

初晴漫興

柳拂朝烟雨乍晴
游絲搖曳午風輕
玉樓人倦尋芳草
金縷歌殘聽曉鶯
舊恨已隨茭竹減
新愁半

為惜花生深春日永閒無事小立蒼苔賦落英

病中春盡

忽忽忘時日寥寥晝掩扉病中詩思減無句餞春歸

婢去

蘭閨數載侍琴書弄粉調脂意自如五夜詩篇常伴咏一庭花竹每攜鋤爐因香燼閒思汝硯為塵侵誤喚渠滿院西風吹落葉更無人與掃階除

午日觀競渡作

午日風光暑未溽陂塘一帶新蒲綠吳兒飛檣掉

龍舟簫管中流弄清曲臨風動蕩水洋洋畫舫珠
簾醉客觴遙望錦標爭奪處綵竿旛影眩湖光懷
沙憶昔沈湘浦黯黯江頭霏怨雨流俗誰知弔古
人空傳水戲臨波舞試問何人續楚騷迎神一曲
奏靈韶斜陽欲下吳門外渺渺愁心悵路遙

采蓮曲

蓮花塘畔花千朶葉葉枝枝風欲舞微波搖動翠
紅香中流宛宛采花女衫似新荷臉似花柔情似
水嬌無語風飄香袖玉玲瓏皓腕難勝蕩輕艣扣
舷一曲起清商藕絲宛轉蓮心苦回船驚散雙鴛

驚脈脈含情望歸浦

夏日病中

風吹簾幕怯微涼病骨支離久廢妝夢醒每嫌依
簾冷神虛偏厭見人忙書能養性攤書卷藥可無
緣禱藥王寂寞深閨消日永一爐遙對靜中香
支枕兼旬思欲昏怕聞人語掩重門宵燈有影迷
虛室涼氣先秋透病根倚席扶行驚地軟回頭放
眼覺空渾最憐幾度呻吟苦每憶無聊欲愴魂

舟過虎邱

蘇臺風景最宜秋山色湖光媚客遊七里烟波人

淡蕩歌聲遙在小紅樓

半湖風月澹烟羅乘興扁舟載酒過莫向虎山高
處望孤祠香塚白雲多

八月初七日作是日奉先嚴諱

秋聲何蕭蕭淅淅悲風木哀哉失怙兒淚血痛盈
幅二載隔音容時物再升穀夢裏見親顏色笑如
在目夢覺失親在一燈照書簾內則父貽書手澤
不忍讀諱日一歸來哭拜座前伏有肴徒精潔有
酒徒芳馥何如人事親八月剥棗熟思之意難申
對棗思親哭愛日不可追春秋徒徃復悵望白雲

飛片蔭下林屋

聽雨有懷

香館悲秋意悄然碧梧蕭颯葉聲傳客中若問閨
中事聽雨懷人夜不眠

春日病中吟

一年春最好艷日方舒長林花爭綺旎嘯鳥調笙
簧大塊假烟景夜遊樂未央何期春爛漫日守爐
藥香辜負一庭花掩關臥匡牀耳目若矇昧意境
徒茫茫人生天地間幻夢炊黃粱夭壽本不貳省
躬識否臧治病須藥餌扁鵲傳良方勿藥亦有喜

古訓如何忘豈以區區者終日事芪黃世間清淡
味葆身壽而康曷若行吾素疏菜日夕嘗春風與
秋月快意時徜徉

苦雨

春隨檐溜盡入夏復連綿花徑苔侵屐琴窗雨潤
絃峯頭迷濕霧林隙鎖炊烟悔種芭蕉葉清宵為
不眠

病目

春閨情黯黯病目最愁予每下雙垂淚常拋一卷
書看花疑霧裏背燭怯光餘辜負園林景韶華二

月初

漂母祠

江頭進食感淮陰不望酬恩詎賞音異日千金輕
出手當時一語笑違心到今萍水全無意伊古英
雄自可欽贏得荒祠人過處幾回繫馬共沈吟

露筋祠

露筋傳古蹟知是屬何人不有貞魂在安能祠宇
新清風鳴翠竹冷月照青蘋寂寞荒寒地曾經幾
度春

蠶婦

風光上巳正宜蠶晴日深窓事素諳眠起關心剛
夜半繭絲縑手話春三不愁人倦難拋枕但苦桑
稀未滿籃待得經綸成五色自家疏布亦何慙

落花

無端風雨破朝昏檢點殘香有淚痕不惜曉寒人
早起琴南硯北為招魂

幾日林亭豔夕霏輕紅淺白已分飛客來惆悵東
風裏地上偏多枝上稀

不見成團蜨影過飄來紅雨隔簾多東君愧少留
仙計怎禁臨風喚柰何

庭院淒迷濕曉烟那堪愁絕暮春天雖緣開落尋
常事待得重逢已隔年

為憶芳菲花滿枝只隨流水溯離思傷心金谷樓
前事不惜開時惜落時

半黏莎草半黏泥杜宇傷春恰恰啼一種餘情猶
未了隨風吹入繡窗西

輓瞿岫雲女史即題述冊

室中豈有散花天解識禪機屬妙年塵夢覺來無
我相虛明鏡裏一枝蓮

一朝眷屬悵分離佛號千聲解脫時慧語翻來蓮

性在分明留得彩鸞詞

咏煙筒

截竹偏生巧為筒亦自如雲霞供吐納物我並吹
噓假借提攜力追隨杖履餘酒闌與夢覺那得不
思渠

乙丑九月送外子之靖江司訓任

琴書檢點送輕裘奉檄匆匆罄別觴江上愁心催
客棹酒邊離緒付詩囊宦情比似黃花冷旅夢還
憐秋水長珍重眠餐萱語切平安早慰倚閭望

簾鉤

一桁玲瓏掩碧鬟半鈎新月玉初彎最憐深院無人處搖曳臨風鎮日間

別母之靖江途中感賦

生不識江海駕言事遠遊戚戚辭故里艤舟楓江頭回家拜慈母惜別話不休榜人催棹發下堂雙淚流一帆破浪去泛泛如輕鷗蘆花意蕭瑟落葉風颼颼路指梁溪曲燈火明城樓微聞女牆上啼鳥聲淒啾推篷望寒月白雲空悠悠

移竹

問訊東橋翠一天蕭蕭鸞尾影隨肩移來容我虛

心學到此推君勁節堅簾捲好看穿徑月窗開分
取出山烟多情別為添清韻風響疏林起晝眠

乞花

虛齋岑寂減春光數到芳菲總隔牆欲語渾忘非
解語憐香應許暫分香從今入手何嫌晚為爾低
頭莫笑狂次第看來成爛漫安排新咏答東皇

春愁曲

纖纖楊柳弄輕烟又是離雲夢雨天燕子來時春
欲半風光惆悵浣花前

雨窗遣興

芳時偏易去，瞬眼仲春來。
花信餘寒晚，雲陰宿霧催。
驅愁方困酒，檢韻且吟梅。
寂寂雙扉掩，青鋪滿徑苔。

三十生朝自述

不覺韶華速，俄驚三十辰。
數年悲失怙，此日轉思親。
歸省時多忝，承歡志未申。
私心慙寸草，何以報陽春。

歲月成駒隙，茫茫秋復春。
任春猶力弱，提汲失躬親。
花月閒中句，琴書病裏身。
慙懷餘結習，回首問前因。

不寐

露濕苔階淨涼生竹徑清鉤簾殘月影入戶候蛩聲乍覺秋風爽偏憐客思驚中宵勞遠夢欹枕待天明

吳門賦別回首經年感候懷人愀然書此

梧館涼深翠葉稀蓮房露冷泣紅衣寂寥官閣添秋色黯澹吟情對落暉客夢不隨蝴蝶化鄉心欲共雁鴻飛閒中無限傷神意默默沈思寒暑違

咏梅四首和鮑浣雲夫人原韻

梅心

羨爾清修得自天訂盟共許歲寒堅不嫌官舍江
邊冷故放香心雪裏傳舊夢孤山曾結侶新知瓊
閣合為緣塵氛不染纖毫淨三昧參來覺了然

梅骨

漫誇色相冠羣芳風骨稜稜傲雪霜月冷空山曾
仗鐵天寒孤幹獨生香疏枝不作迷雲夢幽韻還
看倚竹涼品格箇中誰領畧黃荃試寫費思量

梅夢

氤氲香霧復氤氲縹緲羅浮夢思紛翠羽乍飛驚
玉笛素衣欲化臥寒雲勾留夜月無多住消受春

光第一分自笑浮生同幻境曠懷應問漆園君

梅魂

芳魂默默黯春宵歸到蓬山路已遙十月嶺頭知
乍返三生石上未全消情迷花國身如寄意寫江
干水芙蓉倘得珊珊來月下心香準擬為君燒

清明日口占

東風嫋嫋峭寒天滯迹江城又一年惆悵踏青好
時節野棠梨外雨如煙

鞦韆春戲落誰家鬪草人歸踏軟沙深院簾垂寒
食雨却憑柳色記年華

和高湘筠女史新柳原韻

鶯黃纔染一絲絲，拂水垂檐力不支。
有客乍添懷遠恨，何人剛動畫眉思。
千條欲點青袍色，半臂猶憐碧玉兒。
蘇小門前春獨早，倚妝猶怯薄寒時。
新妝遙對隔簾人，相見年來繫恨頻。
如夢如雲才覲面，和烟和雨不勝春。
難將薄翠藏鴉影，無那低枝漾麴塵。
一種輕盈看未足，應嫌太瘦小腰身。
一番春到意怱怱，樓上看還陌上同。
瘦影又迷青雀舫，輕陰欲避玉花驄。
每憐綽態思張緒，無限柔情問永豐。
幾處芳痕烟黯澹，漫誇有力綰東風。

娉娉丰姿孰與儔數枝低亞弄輕柔每看舞倦勝
衣弱尚覺妝成點黛愁曲譜江干詞綺旎條攀遶
道意綢繆劇憐新色難描畫咏到花飛意便休

李湘浦明府索題曉妝圖為書三絕

沈沈小院柳陰疏鶯語枝頭夢醒餘閒坐繡窗飛
絮滿水晶簾捲曉妝初

春風記取畫圖中人面花光暈淺紅知否窺簾雙
燕子似曾相識桂堂東

輕衫杏子服初成鏡裏蛾長入鬢橫花事關心春
事早玉簫玲重譜新聲

和唐陶山明府重修桃花仙館詩原韻二首
荒涼遺址幾成塵歷劫重看祠宇新黃絹才名憐
異代青衫歌哭弔詩人寒雲碧草悲前事仙館桃
花想後身長吏風流題碣在瓣香留得昔年春
寒燈清澈即禪燈風味儒家淡似僧曠達文章成
放誕佯狂詩酒亦真乘意中元妙皆先諦身外機
緣盡割藤幾樹紅霞一坏土千秋也擬說唐陵

霜螯同外子作

風高沙渚漁舟泊霜蟹初肥行郭索蘆洲花白霧
冥濛葦岸草黃烟密窳老漁偃影對寒塘幽火一

星出林薄斜拖小斲浪花微淺插輕篙曉月落九月團臍十月尖攜來朝市萸茱縛新霜剛及菊花天缸面香篲正堪酌分黃尚帶水風腥持螯好共新薑嚼一番雅興託吟箋回首湖鄉憶寥廓

炙硯

呵凍寒窗下冰花結硯池淩風凝的皜得氣渙淋漓翰墨陶鎔候雲烟揮灑時江天猶暮雪撥火細敲詩

護花

梅因冰雪擅風華菊伴三秋處士家畢竟人情憐

國色金鈴常護牡丹花

摘花

數枝和露鬪芳菲采罷餘香浥袖微
侍女不知含
笑問幾時沈水又薰衣

分花

剛是春風入手時妝臺斟酌好相遺
姬人拈得雙
蘭笑分朶兒家插鬢宜

惜花

幾番微雨幾番風愁絕闌干點落紅
心事惜花兼
惜影夜深常伴月明中

新妝咏

朝閣奩開鏡衣卷春風婀娜花枝軟翠鈿輕貼鳳
鬟斜玉掃微攏鴉鬢淺攬衣宛轉步香塵錦段流
華幾倚身心事欲書桐葉剪向人脈脈却含顰

戊辰三月自靖歸省書贈家弟竹軒雲亭

江水江雲打槳遲三年兩度數歸期鶯花滿眼春
帆路歲月催人旅思詩單袷衣裝行李薄寒氊故
態宦情卑入門贏得慈闈喜棣萼樽開醉幾卮
靜吟芳草寄閒身小住光陰閱幾旬客歲浮槎逢
八月今年歸夢正三春囊琴絃澀忘時調翠管香

生避俗塵為問故園好風景杏花烟雨一番新

澄江道中

烟雲竹樹影重重山色湖光一望中正是夕陽好
時候輕舟遠市落寒篷

旅懷有感

院落清砧起風吹敗葉多雁聲驚客夢秋影薄雲
羅舊恨班姬扇新詞子夜歌漫嫌黃菊瘦人面又
如何

枯樹

老樹懸崖秀渾疑降斗槎空山餘夕照古屋噪寒

鴉節勁忘冰雪根堅歷歲華枯株終不改榮落異
春花

水仙花

清絕丰姿水一方仙裾摇曳五銖涼月明江冷疑
無影人靜風微覺有香銅磬安排依短榻綺疏供
養伴寒妝凌波約畧珊珊態誰託微辭問翠鄉

賦得夜半鐘聲到客船

一天霜冷對殘缸蕭寺清鐘斷續撞音度寒雲來
碧浦韻隨宵柝到篷窗蒼茫夜色烏嘯月黯淡疏
林客繫艤隔水村砵聲細細前溪漁火影雙雙塵

心半洗空堂梵幽夢初驚曲巷履好趁桓伊三弄
笛不須楓落唱吳江

柳枝詞次鮑浣雲夫人韻

鶯黃纔向早春回好倩東風細剪裁記得旗亭長
短處曾舒青眼向人來

臨風低折舞腰輕婀娜應憐太瘦生葉葉枝枝牽
別恨隔花偏送小鶯聲

綽約丰姿倚板橋天涯悵望路迢迢陌頭春恨添
如許眉樣閨中未易描

萬縷千絲引緒長幾回清夢到池塘五陵却怪諸

年少只解斑駁繫綠楊

飛絮飛花最不情
輕絲踈地雨初晴
何人江上剛聞笛
聽到陽關第四聲

嫋嫋柔條浥露鮮
好憑輕軟折為圈
如何不綰春光住
一任風吹榆莢錢

擬閨夢

解讀高唐賦
巫峯約畧中迷雲
低楚岫夢雨憶吳宮
冒蜨千花繞
憐香七寶籠
情深餘逸思
釵墮枕痕紅

燈下課沂兒書示

一編書課寒燈下努力青年莫寬假自來文史足
三冬映雪偷光古賢者勵志豈惟事博聞束身制
行過宜寡吟風弄月是閒情佩實銜華乃大雅儘
有才高意氣狂文章傾吐詞源瀉頗聞敦品重廉
隅豈獨摘華尚班馬吁嗟力學貴真純勉脩文行
無苟且

余和浣雲夫人柳枝詞夫人即於是夏仙逝
人琴有感為賦二絕

纔和玲瓏楊柳詞驚聞鸞馭返瑤池蓬山不是關
山路翻似臨歧贈一枝

年年柳色總依然人去花飛嘆逝川
翰墨因緣餘涕淚淒涼遺韻付遊仙

秋窗雜興并引

紙窗夜靜燈火可親冰簟涼回羅紈已薄
簾風搖曳吹來萬戶砧聲蟲語纏綿坐轉
一籬月影惆悵海棠庭院露冷猶嬌徘徊
楊柳池塘烟疏益瘦感歲時之流轉覺秋
色之清華宋玉新愁班姬舊恨聊吟斷句
遣此閒情

金井黃凋梧葉飛漸拋紈扇夜涼歸秋風幾處催

刀尺檢點羅襦怯薄衣

蕭蕭窓竹透新涼露滴蓮房褪粉香留得殘荷宜
聽雨義山佳句費思量

疏星點點淡秋河乞巧樓前七夕過知否頻年離
別意人間私語又如何

空階蛩語攪愁心隔院風來報早砧燈火雞窗人
未寢露華月澹海棠陰

解讀離騷易感秋鬢絲添上幾莖愁西園衰草飛
黃蝶試問紅顏似舊不

一聲清笛起誰家勾引鄉心入夢賒寄跡江城頻

憶舊三年八月悵歸槎

風簾搖曳玉丁東高閣閒憑悵碧空一帶夕陽斜
度鳥白蘋江上蓼初紅

澄波如練接長天回首林皋鎖暮烟楓樹漸紅秋
漸老閒情疊上衍波箋

寒雅

木落郊原冷啞啞噪晚晴幾行斜照淡一帶暮雲
橫陣壓空江黑翎翻敗葉輕沈吟思樂府閒譜夜
鳥聲

雪夜用東坡聚星堂韻却寄家弟吳門

凍雲擱樹疑浮葉寒壓空江天欲雪閒憑高閣望
迢遙白浪千盤帆影絕晚鴉風急亂相呼喧落林
梢枝踏折一點雨點絮初飄到地飛飛影旋滅回
看遠勢玉龍蟠却訝天公亂鞭掣此夕燈寒火不
明窗前硯水微生纈欲呵凍筆寄閒情重撥薰爐
洒香屑却憶梅花伴綺窗鄉關往事成飄瞥剪燭
聯吟共一時低徊舊夢何堪說天涯轉輾繫離愁
寒透重帷衾似鐵

己巳仲冬陳姬舉一男三日殤今春余生一
女又不育傷今悼昔感系難忘因成七絕

四首

寒霜已折嫩蘭芽入手明珠又委沙雨度傷心悲

噩夢

十月杪余夢赤黑兩蛇自牆墮地

水中明月鏡中花

來何因果去何為幾日呱呱泣繡幃本是連枝同
隋劫賺人歡喜賺人悲
臨去遲遲若有知待儂提抱看歸時一言囑汝休
依戀我未劬勞爾莫思

埋玉雙雙就院旁月明風露最淒涼一抔黃土千
行淚寒竹蕭蕭當白楊

夜聞江風口占

官閣瀕江地長風送夜寒聲兼波浪湧氣接水天
寬瑟瑟穿窗冷蕭蕭攪夢闌攪衣凝坐久微燄一
燈殘

春陰

餘寒料峭放花遲楊柳輕陰閣嫩絲漠漠濃雲高
樹重霏霏細雨暗苔滋風流杜牧傷春病放達劉
伶中酒癡寂寞蕭齋吟興嬾攤書閒對擁爐時

題漁樵我我圖

林木森森護翠嵐溪源山脚縱幽探漁樵溷迹渾
忘我身外身須箇裏參

間雲舒卷本無心寫出高人寄託深會向烟霞微
結習野花幽鳥亦知音

咏風箏美人

前身豈是許飛瓊會向雲衢問舊程千里緣憑牽
線去五銖衣好御風行亭亭弱質三春瘦裊裊柔
情一縷生遙聽清箏天外響却疑吹下步虛聲

題揚州夢傳奇

三月烟花記勝遊二分明月說揚州問他廿四橋
邊路碧玉吹簫何處樓

最是風流杜牧之青樓薄倖憶當時春風十里珠

簾捲譜出旗亭絕妙詞

春曉曲

春風院落餘寒送一樹梨花雲欲凍深窗靜閉畫
簾垂寂寂空庭朝霧重宿火香纔冷翠猊殘燈影
尚餘燒鳳數聲百舌隔花曉愁絕樓頭春曉夢

琴心

一曲琴心感不勝多情此夕究何憑相如解賦長
門怨何事重將聘茂陵

餞春詞

一番花事數番風惆悵春殘三月中楊柳絮飛紅

藥雨又看蜂蝶過牆東

嫩綠新陰護短牆一簾細雨伴吟香
年年烟景留連候最是風光憶海棠

清明寒食已都過淺夢如塵喚柰何
隔院流鶯疑亦嬾綠楊陰裏不成歌

賦得萍始生

嫩色漣漪碧浮萍媚晚春野塘添活水
柳絮認前身點點淩波小紛紛貼鏡新
也如隨意綠弄影曲

江濱

綠牡丹

謝他魏紫與姚黃
覓得花宮點黛芳
月下翠盤承露氣
風前倩影瀉衣香
綠珠雅擅無雙豔
碧玉原知第一芳
試向筠簾深處望
迷離烟景暈新妝

白牡丹

鞞紅歐碧鬪芳叢
素豔偏宜傍綺櫳
自是白描留粉本
不須錦障護春風
天香夜染梨雲夢
國色朝翻絮雪空
花苑移栽明月夜
露珠涼影玉盤中

留別馬沙學舍

馬洲五載薄吟中
領畧江山興不同
今日歸囊無別物
半肩行李一詩筒

藥闌花砌手親栽桃李春風幾度開
臨去金鈴重一護芳華留待故人來

新月

窗前遙掛一鉤銀素女修眉半未勻
最是蟾宮仙筆巧寫來留與晚妝人

--	--	--	--	--	--	--	--	--	--	--

靜香樓詩草卷下

吳門 吳 蕙 靜香

竹軒大弟以范雪儀秋閨鬪蛩圖囑題即和

原韻

昨宵涼夢如雲墜
蛩聲似傍苔階翠
懊恨淒淒唧唧情
詩懷不覺愁心帶
却笑雕籠貴客堂
斂金賭勝夜秋涼
烏頭金翅分曹列
繪出蘭閨擅勝場
勢工搏擊當筵奏
斂翼相看眼不溜
却似兩雄對陣時
齧齒潛吞猶未鬪
一幅傳來有歲年
收藏不惜錦裘錢
吟成涼月看侵簾
無限秋情到枕邊

寒山寺懷古

問訊南朝舊寺禪，荒臺青鎖夕陽邊。殘碑土蝕才

人筆

寺有唐六如
化鐘疏石刻

古鼎香消老佛烟，繞岸江楓吟

落月隔溪漁火對，霜天鐘聲自昔敲。寒夜多少羈
愁喚不眠。

庚午家中度歲作

頻年冷署寄為家，殘臘歸心感夢賒。今夕團圓依
膝下，愧無新思頌椒花。

東閣梅開淑景舒，圍爐小飲樂閒居。兒曹也解三
冬課，隔院猶聞夜讀書。

忽忽人事歲除忙
柏酒辛盤佐客觴
幼女不知煩
屑務但誇剪綵入時妝

題寫墨樓合橐

譜就鴛鴦字字金
只憑同調寫同心
閨房雅集緣
天合流水高山互賞音

自春徂夏病目無聊偶效短歌以遣餘悶

翠幕深沈護曲闌
麥秋時節曉生寒
年來辜負看
花眼惆悵風華三月殘
偶然得句豈求工
聊寫心情似夢中
倚枕呻吟偏
日永數聲啼鴉半簾風

一番飛絮撲香塵又說清和景物新
綠滿庭柯紅滿地送春愁殺隔窗人

酴醿香夢有餘清綠葉天涯子又成
回首韶華春百五愧無好句寫閒情

讀有正味齋壺盧學士歌漫賦

從來妙語葫蘆提學士壺盧漫考稽
千古生花惟有筆風華留與後人題

東臬隱秋夜

夜氣迎人爽涼風入戶幽荷香才滌
暑竹露已驚秋笛韻誰三弄詩情擬
四愁宵深忘燭燼斜月到

簾鉤

畫梅

素不解繪事添線勤刺繡無聊試寫梅藉遣消寒
候殘脂點芳菲餘墨審去就疏疏枝上花薄薄天
寒裏屈指計春光信筆娛清晝雲烟揮灑間毫端
香欲逗庭梅似有知疏影橫窗瘦

花朝

昨宵嫩雨曉晴烘撲蝶人來小院中獨倚筠籠情
悄悄落梅簾外幾番風

鶯囀燕語鬪春韶一半風光到柳條草草勞人忘

令節都因兒女說花朝

遊錢氏息園登妙嚴臺

韶春烟景正暄和
裙屐人來勝地過
三月鶯花新
翰墨六朝金粉舊
山河瓊裾玉佩空
陳蹟水榭風
軒倚短歌試上崇臺橫
落日漫思往事覺愁多

四春咏次王南垞孝廉韻

春樹

幾樹新陰隔翠鬟
東風先到白雲關
烟痕綠潤千家雨
畫意濃遮六代山
幾日看花芳院倚
何人贈柳大隄攀
最思邨落斜陽外
桑影垂垂十畝閒

記

士商賜顧者請
認仁記不誤

春花

淡紅香白影窺簾
浥露清芬向曉添
蜨夢迷離三月暮
蠶房醞釀一春甜
芳菲有意庭陰傍
豔冶何堪屐齒黏
檢點繁華無限思
年年榮悴倚風尖

春草

曾記褰腰鬪色新
又看陌上草如茵
平連古寺橫斜照
細碾香輪漾麴塵
濕翠最宜寒食雨
晴烟遙憶曲江春
萋萋是處離情滿
誰向天涯付尺鱗

春鳥

春深鳥嘯綠陰低
不分山溪與水溪
芳徑客來攜

飮聽玉樓人怨隔花曉劇憺風暖聲如碎無那情
多喚欲迷九十韶光催杜宇流連香館且分題

七夕

綺席安排五色絲一爐香炷拜階墀銀河浪靜無
聲處烏鵲橋橫欲渡時天上星期勞悵望人間私
語繫相思年年此夕成長會牛女何嘗怨別離

暮秋送仲如朱孺人權厝婁阡

人生雖云寄死別良足悲與君況娣姒趨侍長相
隨自從幽明隔音容無見期鏡臺空月影繡榻懸
蛛絲忽忽逾二載哀思無已時送君城北去雲樹

遶寒漪白楊與衰草蕭颯滿荒陂再拜一回麝不
禁雙淚垂魂兮若延佇盡此酒一卮載歌薤露曲
淒風捲靈旗

盆中白菊陽至尚華紀以一則

庭凋衆卉喬柯子座有寒英矜晚節落落疏疏冷
著花賁稱无咎尤高潔自將澹白寫秋光傲霜畢
竟誰同列三冬功課惜三餘乙巳其今耐冰雪賸
粉殘香尚有姿閒情

曉夢初

回虛窗弄影看清

乙巳

風亭月

石罅藤蘿欲架附

到枝

頭鳥弄歌二十餘年

婆娑

過幼時授經書室

曾記春風侍昔賢
裁牋弄筆事年年
重來絳帳譚經處
回首前塵一惘然

壽外子四十詩

廿年初度賤子歸
共說同心願不違
轉眼韶光重疊慶
奉匭兒婦侍庭幃

贈花猶記十年前
戲作詩謎袖裏傳
今日成陰多

結子稱觴添舞綵衣鮮

新詩餞臘待春還果榼椒盤綺席環室有餘歡風
亦暖好憑杯酒共怡顏

見長媳畫蘭篆書喜成二絕

蘭心端合寫蘭葩幽韻傳來筆底花香草春風無
限思吟窗染翰自成家

豈須筆墨擅才名淡雅天然見性情柔腕幾行蚪
蚪字書成蘭室有餘清

丙子暮秋送女金陵舟中漫興

一櫂西風意惘然都因嫁女別懷牽黃花笑我難

忘俗憔悴支離似去年

半林紅葉暮秋時漁父磯頭落日遲多少間愁暫
拋却江山到眼動吟思

由京口出大江望金山用東坡遊金山寺韻
一條水自岷山來駛絕奔濤直趨海片帆我出潤
州城搖入中流偏自在亭亭浮玉卓陂陀十月天
寒水落波雲影半江漁唱杳雪花兩岸荻聲多峽
流轉處飛輕楫一壩臨空標落日隱隱山坡僧寺
中新霜乍染楓林未回看寒月光生魄極浦低垂
雲脚黑抽颿入港遠峯明洲鷺沙鷗靜不驚此際

林嵐如舊識此時襟抱空無物天然圖畫好江山
寫入毫端興亦頑晚霞明滅看無已何限詩情落
江水

送長女于歸隴西

相送征帆渡遠溥結褵嬌女繫情深叮嚀囑別無
多語願汝宜家恆素心

奩無長物笑儒寒繡得鴛鴦上錦端好效和鳴雙
比翼庭闈朝夕並承歡

禮傳內則訓宜從婉婉應知有愧容此去閨儀須
敬慎錦堂重疊紫泥封

金陵懷古

試向江頭盼夕暉
六朝山色是耶非
樓臺日晚鶯
花老城郭春深
燕子飛尚有垂楊圍
白下何妨舊
巷問烏衣
一番憑眺
閒中感短艇
乘風出釣磯

白門將歸作

白門哀柳已殘絲
水落江干樣櫂遲
燕子磯邊帆
到處莫愁湖畔
客來時
郵囊愧乏詩
千首離席頻
傾酒一卮
婚嫁此身猶未了
暫憑驛堠數歸期

臘月展母墓歸舟作

悵悵慈雲問渺茫
一坏新土掩重岡
歸舟兩眼思

親淚灑向西風過野塘

丁丑小春至常州學署作

梓翠松陰夾道斜春風庭宇靜無譁
誅茅新闢三間屋開徑分栽一院花
高閣間憑堪望遠郵程經宿乍辭家
回思打槩衝波險六載光陰感鬢華

兩度攜家喜一方當前風景且相將
圖書插架貧猶樂苜蓿堆盤冷亦香
異地初來尋句健間官多暇課兒忙
當杯輒笑青蓮句名重題詩琥珀光
陳酒余不耐飲

戊寅七月十五夜作

時余家居
伴沂兒病

下重門靜挑燈意黯然愁人知夜永病葉感秋
先閨思蟲如訴鄉書雁未傳不堪今夜月已是十
迴圓

宿業憑誰懺閒愁只自知病魔空累藥心緒歎夢
絲對酒渾無賴敲棋亦嬾思一般清興減排悶強
裁詩

次女于歸汝南詩以勉之

少小依母如憐愛逾常兒提抱惜寒暖鞠育善護
持每慮嬌癡性未嫻淑慎儀春風欣鬪草長日弄
花枝忽忽髫年去轉瞬及笄時汝南聘作婦納徵

並請期女子有行日義往未易辭內職無一諳何
以家人宜婦道從此始庇蔭賴姑慈無違與敬戒
切切再致詞冀汝循婉婉福祿自相隨

歲杪返棹毘陵水窗偶作

怱怱歲事漫相催且放蘭陵一櫂回官閣梅花三
兩樹關心却憶幾枝開

計日春歸人亦歸膝前兒女久相違一堂好慶團
圓樂柏酒圍爐對夕暉

得大女滇南撫署信書此却寄

音書萬里話千端入手魚緘反覆看吳樹滇雲無

限思只期兩字說平安

寂守毘陵首宿盤青瓊仍是舊儒寒向平累重年
來事多少家言欲寫難

夜坐無聊選韻偶感

閒宵倦欲憑几臥挑燈弄筆將愁破為詩自道本
怡情隨意拈來字幾箇少歲耽吟老未工蹉跎歲
月成吾過吁嗟乎心不專兮學不成為言膝下須
勤課

題天女散花圖

迴風看妙舞悟徹雨花天色色超凡相如如證淨

緣拈來含笑問著處已情牽結習知誰在言詮未
盡捐

別蘭四首代和王茂園別駕原韻

楚澤移栽一束春吟蘭幾度感前因銀燈寫影香
岑寂彩筆留題意苦辛紉佩深情疑昨夢含芳竟
體悵懷人秋風吹散添愁思霜菊階頭孰與鄰
猶記清姿傍玉尊每邀夜月照纖痕輕烟淡粉餘
愁怨宿露殘膏隔曉昏別夢依依香不返離懷耿
耿恨長存蘭因絮果由來事色相參空即慧根
春歸猶唱惜春詞逸韻清芬只自知入室空憐人

去後凭欄又見月明時芳餘澤畔無心擷愁向燈
前有所思仙子多情應不見天台重到訪還遲
素心相對願非奢清淡襟懷自足誇水石三生緣
共證塵寰一念路先差風枝露葉悲榮悴秋蟀春
鷓感歲華漫說彩雲容易散惜花吟到句籠紗

花影吟房見長媳雨窗畫蘭作

重簾不捲夢秋寒濃綠陰深護曲欄梅雨一窗清
韻遠漫磨新墨寫叢蘭

古鏡歎

團團古明鏡背刻盤螭字臨花照影是何時土蝕

塵封幾年棄攜來拂拭玉臺前
曉月熒熒眩珠翠
試問前人更後人
照歡照愁幾行淚
紅顏回首鏡中春
對此茫茫何限意

玉簪花

晶簾捲處曉窗幽
素萼迎風賦早秋
昨夜月明涼露下
許飛瓊墮玉搔頭

冰姿浥露最清妍
占得秋光第一仙
珍重花神偏有意
別饒風致未開前

寒夜聞雁

長漏迢迢雁陣寒
數聲嘹唳過雲端
誰知綺閣人

眠未又為留題刻燭殘
側耳西風颯颯聲雁奴幽咽最淒清
憐渠不傍蘆花宿獨向霜天叫月明

夜課四兒口占

挑燈課讀且吟哦無底書囊可柰何
惜及分陰原不易等閒歲月莫蹉跎

二月十六日作是日奉先慈諱

最憐怙恃並相違夢裏親顏見亦稀
庭院年年芳草綠傷心無計報春暉

庭中秋海棠初放

秋容淺淡試新妝
露浥柔叢別有香
徙倚畫欄無限思
似含幽怨背斜陽

秋風秋雨總嫣然
瀟灑丰姿態若仙
記取懷人千點淚
斷腸芳草自年年

遊慧山二泉亭至寄暢園得詩二首

九龍何蜿蜒
靈液滿山腹
渟泓滙小池
曲流穿林麓
差差散輕風
澄波動微縠
我來二泉亭
斜陽隔蘿屋
桂枝生晚香
潺湲響寒瀑
境靜心亦清
幽懷共涵蓄
探手試泉流
清泠不盈掬

閒雲不歸山
好鳥得幽意
園林送清香
松竹隱寒

翠謁來憇小亭綠池靜生媚何人記遊詩刻徧琅玕字循堤縱幽探泉石愜清思出門有餘戀回首望初地

滿城風雨近重陽

滿城風雨近重陽庭院猶餘晚桂香簾捲秋窗添畫意半林寒影葉深黃

滿城風雨近重陽別館題糕引興長一筇莼羹思未得蘭陵杯酒伴寒香

滿城風雨近重陽徧插茱萸憶故鄉料得連牀清夢好每逢佳節醉飛觴

覺老

朝來攬明鏡狀貌無掩匿齒落不更生鬢華難再
黑容顏異昔時自視幾不識昔非桃李姿芳澤猶
堪飾老醜成今吾可憎憔悴色揆其所以然畢竟
誰戕賊或因寒暑催或為憂患迫顧茲廿年中怙
恃悲罔極兒女漸成行鞠育尤為職向平累更繁
忽忽衰筋力然聞勞逸論法語遺常式貴賤及賢
愚並以勞為則明動而晦休孰可云遊息人生誰
不老戒老在貪得若以狀貌衰感歎誠偏仄作詩
聊自箴無為形神惑

春盡日小飲花下和外子韻

韶光九十付逡巡
婪尾花開景一新
遶院綠陰搖翠幕
撲簾紅雨委芳塵
澆愁有客頻攜酒
贈別留題為餞春
芳草斜陽無限思
年年惆悵倚闌人

題桃花扇傳奇

秦淮烟月畫樓空
南部笙歌短夢中
一氣興亡離合淚
付他紅粉泣春風

茉莉花詞

冰姿玉蘂淡生香
摘露分珠趁晚涼
正是夕陽花上市
聲聲喚賣過東牆

爭誇潔白擅風流小朶玲瓏戲簇球
攜入紗櫥清夢遠枕函留伴玉搔頭

詠西瓜燈

一片琉璃碧燃燈戲鏤瓜雕鏤同琢玉
裁製抵籠紗縷縷痕攢翠層層焰吐霞
玲瓏延月澹璀璨鬬風華物巧因人巧
心花撰燭花回紋重疊刺圓影淺深遮
水鏡光相映冰壺潔共誇青門饒五色
宜耀故侯家

癸未仲冬七女幼殤哭以三絕

蕭瑟西風觸目悲也知泡影痛何為
思量嬉戲牽

衣日難禁傷心雙淚垂

病遲醫藥悔蹉跎短夢輕塵六載過痛絕臨行猶
喚母悠悠久別竟如何

送汝輕颿趁雪晴魂兮歸識故鄉城一坏土寄諸
姑側月冷空山免獨行

春仲即事偶吟短歌

春風送暖香生陌天涯又見薜蘿碧昨宵吟盡燭
花紅今朝烟景梨雲白眼前佳日等閒看勞人草
草何曾惜舊恨新愁似草生病魔酒債如絲積百
歲光陰過隙駒雪泥鴻爪惟留迹浮生若夢幾何

歡自笑何時煩惱釋

養蠶詞

春晚蠶桑課深閨罷曉妝試看來處苦勿浪繡鴛
鴦

折楊柳

我歌金縷曲空枝自相惜我歌楊柳青花枝折不
得楊花輕薄逐天涯遊子離鄉路漸賒折來今日
送行去愁煞征人不憶家

題張蘭卿女士詩畫便面

鏤雪裁冰絕妙詞簪花標格擅丰姿焚香煮茗清

間課想見臨風脫橐時
曉妝驚鏡玉為臺人似臨池向月來留得胭脂餘
翠盒春風點染絳桃開

肄書寮夜坐

蟲聲如語太纏綿星斗澄空悵碧天深院涼回秋
瑟瑟虛堂人靜月娟娟吟毫久撇塗鴉懶鄉思無
由倩雁傳多少閒情消已盡漫隨鷓鴣感華年

初秋接家弟見懷詩却寄

三年離思遶江干憶昔歸帆笑語歡棣萼連宵同
剪燭夜深梅雨不知寒

譚來往事渾如昨忽忽年華鬢已絲婚嫁此身何
日了向平心願邈難期

涼風天末動吟思又是初秋葉報時冷暑寥寥誰
破寂瑣窗細咏寄懷詩

乙酉仲冬三女于歸舅家詩以示之

渭陽舊誼訂新緣堂上情親自得憐檢點繡奩相
送去江頭暢好晚楓天

繞膝依依二九年驟離香閣覺愁牽雞鳴戒旦羹
湯奉與汝相期作婦賢

盈盈一水寄懷深結帨施衿致別忱婉婉自循終

協吉宜家宜室賦同心

偶觸

物理推移處當前觸目驚秋蟲鳴促織春鳥喚催
耕駒隙三冬駛螢囊五夜明寸陰宜共惜自歎愧
浮生

竹軒大弟寄示遊山詩因簡二絕

尋山有興賦遊山一卷新詩攬秀纒我正寂寥閨
閣坐恍聞澗水響潺潺

昔同選勝憶髫齡約畧經行長短亭四十年來遊
跡斷負他山色向人青

丙戌七夕

雲母屏開燭影深
纖纖初月上桐陰
相呼女伴簾前去
綵縷迎風度巧鍼

幾點螢飛小院幽
輕羅扇已怯新秋
年年乞巧依然拙
再熱心香拜女牛

刪改舊稿有感

舊題重賦意沈吟
檢點餘編到夜深
自笑頻年詩思減
毫端都為俗塵侵

綺歲耽吟句未工
刪除風月語雷同
幾回陳跡重尋處
退筆殘花惜落紅

塗鴉聊爾遣閒愁。此事消磨幾度秋。他日有人搜
蓋篋，斷煤殘本數篇留。

待曉

一燈留待曉，倚枕幾回看。冷月窺簾白，霜風逼戶
寒。夢隨鄉思遠，漏共角聲殘。此夕偏增感，吟餘覺
未安。

許烈婦哀詞

婦趙氏華亭許祖恆
室夫亡無子遂日經

玉樓仙客赴修文，痛絕深閨鏡忽分。真個鴛鴦會
雙死，千秋重義孰如君。

堂前侍疾兩心符

先是翁病時衣不解帶者七十日

地下相隨志

不渝看到斷釵腸亦斷羅巾三尺了香軀

撫育無需意灑然晨昏有侍免懷牽

婦每謂夫弟成立嗣子雙

祧此心匪石真難轉願向重泉報所天

歲晚四寒詩

歲事已云暮北風吹面寒遙知行路客雨雪送征

鞍

風勁嚴威肅高枝積雪寒庭梅香信早凍雀莫銜

殘

斗室攤書坐爐煨楮拙寒筆並開凍管新句得吟

安

綺閣重簾捲臨妝怯曉寒早將鍼線罷檢點五辛盤

雜詩

日月無停機江河無定流人生百年內閱世同浮漚何事常役役徒懷千載憂精華宜自葆神仙不可求不見翩翩子轉瞬已白頭

簪纓不為榮布衣不為耻世俗慕紛華貞士篤踐履無欲斯安恬知命即知止窮達自有數奔走空復爾富貴能幾時榮悴一彈指嗤彼朱翁子錦衣誇鄉里

艾虎

歲時荆俗紀天中艾虎懸來氣象雄
色繫綵絲偏露爪威分蒲節欲生風
辟邪好共釵符映吐豔還依榴火紅
却笑兒童爭佩得香閣新樣鬪玲瓏

梅雨連旬小齋撥悶

廉纖細雨曉生寒薄薄輕羅怯倚闌
幾樹新陰簾色暗一庭空翠屐痕殘
檐垂蛛網絲頻冒壁滿蝸涎濕未乾
花事已闌成寂坐試將春咏寫霜紈

題湯慧貞女史畫扇頭美人

其人如玉其態若仙芝蘭臭味翰墨
因緣左琴右

書描寫芳妍書不玩索琴不上絃箇中真趣妙解
天然清風披拂恍遇斯賢

秋夜吟

月鉤搖曳疏簾押露涼如水侵單袷滿林黃葉起
秋聲惺忪短夢情初怯

寒衣又欲催刀尺聊將鍼線娛朝夕莫向天邊盼
雁行家山遙隔傷心碧

殘星幾點雲羅薄涼風已至悲搖落長笛誰家尚
倚樓一聲聲和秋城柝

壽長姑黃節母八十詩

喬柯挺勁骨女貞耐嚴霜節孝推長姑清操同稱
揚弱歲鏡釵分畢生冰蘖嘗辛勤六十載懿德延
休祥婦婉承甘旨嗣賢冑構堂孫枝亦競秀早解
頌如岡開筵慶八袞濟濟稱霞醴松柏歲寒姿鶴
籌添算長憶昔幼隨侍情同猶子行自違二百里
難將一葦杭臨風託蕪翰遙祝壽而康

晚香書屋種菊有年矣今秋發花頗盛惜未
一玩書以自遣

曾記連番插竹籬秋風紫翠幾叢移花時小立斜
陽外黃蜨飛飛繞院吹

年來臥病怯新寒花正芳菲露氣團無限秋光偏
寂寞幾回清夢落闌干

折得餘花三兩枝膽瓶聊插慰秋思却憐夜色昏
黃候燈影參差寫韻時

己丑仲秋送五女于歸隴西

彩鷁秋風指鹿城欣看百兩到門迎由來淑順宜
家室記取閨題兩字名

傳家詩禮誦清芬年少才華定軼羣此去重闡承
色笑雞鳴昧旦兩心慇

無違敬戒訓周詳眉案還期白首莊珍重眠餐休

惜別嶺梅風裏盼歸航

玉峯道中書景

玉山遙望森浮圖嵐光髣髴臨秋湖迴塘路轉山
忽隱邨墟林落時有無回頭瞥見峯窈窕山色當
窗近尤好臨風秀削玉玲瓏瑟瑟晴烟霏秋嶠此
中佳景足幽尋築室當年金粟林風雅主持數十
載林亭歇絕烟銷沈一回瞻眺空棖觸幾人消得
山林福浮生自笑繫塵緣空對秋波縣縹緲綠

秋閨

一燈相對檢牙籤靜聽秋聲萬響兼病骨每嫌風

露冷為貪明月又鉤簾

庚寅春正哭歸平陽妹六首

一水相違見面難去年惜別淚頻彈那知此後成
追憶永訣平生姊妹歡

鏡破釵分十四春撫孤不異所生恩顯揚縱得焚
黃日怎及萊衣繞膝溫

泉路無由問渺茫魂兮何處月昏黃最憐環佩歸
來夜嬌女哀啼總帳旁

腸斷東風雁信寒追思往事益辛酸未止知爾餘
生憾此日相依地下安

連枝骨肉最關情
惡耗傳來夢亦驚
曾幾何時杯
酒笑教人疑信未分明
欲寫哀詞淚暗垂
鄉關回首掩空帷
夜臺若解平時語
死別生離一樣悲

春晚病起

去年小病惜春殘
少日清吟興已闌
今歲愁中春
又晚光陰真箇似彈丸

養疴每覺起偏遲
瘦骨年來漸不支
簾內餘香簾
外雨惱人情緒落花時

艤舟亭

雲物清華桂子秋
艤舟亭畔繫輕舟
興懷玉局風流遠
洗硯池邊為小留

亞字闌干遶曲池
芰荷猶有未殘枝
晚來風過清如許
檻外花香立少時

亡妹葬有日矣先期奠別哭之以詩

西風吹送薤歌聲
地近橫塘山水清
黃土珠塵留小劫
白楊秋草掩佳城
斷腸姊妹情何限
彈指年華感易生
殮不憑棺窆不視
傾觴難制淚縱橫

梁溪道中

蕭條風景已殘秋
短檣衝波一葉舟
老去情懷憐

倦鳥間中身世笑浮鷗蘆花深處藏漁艇楓樹紅
邊隱戍樓遙指夕陽帆影亂暮山寒色落船頭

咏臙脂

春生笑靨齒生香薄薄猩紅暈海棠膩棄秦宮隨
逝水污嫌號國洗新妝沾脣豔欲欺樊素點額嬌
還做壽陽更羨拈花留一捻至今妃子尚餘芳

却憶

鼠姑欄外笑含顰檢點殘芳已暮春料得舊廬穠
豔好看花誰問種花人

滋德堂舊居牡丹
頗盛今已易主

蒼松古木舊書堂蒨草侵階翠帶長最憶秋宵池

上月北窗涼透桂花香

池上書堂
舅起居處也

先

昔年薄宦住江干種竹栽花隙地寬徹夜潮聲眠

不穩半空風雨一樓寒

指在馬
沙時

仲容生小便工詩寄我傷春絕妙詞聞道近來常

臥病風流不似少年時

前在馬沙小泉大姪
春詞索和近聞家居多恙

辛卯初夏遣大兒媳歸里門口占示之

聊從三徑剪蓬蒿習靜心情避俗囂几淨窗明無

箇事一編書好課兒曹

閨中良友亦堪師蘭韻詩情互賞時疏水相安餘

樂意莫因定省動離思

哭竹軒大弟

去秋一別死生分極目家山雁斷雲苦雨淒風揮

老淚連枝零落復何云

去春平陽二妹先逝

幼同筆硯最相親幾昔歸帆話舊因袖出新詩邀
疊韻而今沈痛渺前塵

永懷罔極黯神傷同氣情深感異常此日孤吟予
季在不堪重憶舊池塘

雙槩歸遲一面難石尤風阻倍心酸自憐訣別無

緣甚忍把遺編掩淚看

聞病中時作詩

哭說齋大姪

玉樹駢枝秀經霜折一枝青衫餘舊淚黃絹寄哀
思悲慟嗟予季零丁恤嗣兒淒涼寒月夜書卷冷
虛帷

斷鴻悲未已又痛阮咸亡併作傷心事難求起死
方前因殊夢幻壯志竟埋藏最是彌留際遺言睠
在堂

和雲間王綺思夫人見贈百韻

敝廬咫尺接芳塵

君家花橋西距余居僅數武

隨宦頻年繫企

深忽枉瑤華吟斷句愧無瓊玖報題襟

每逢佳節暢吟懷

夏間曾以端陽雜咏寄示

柳絮妍華絕妙才

此日故鄉梅放早生花彩筆咏花來

分題妝閣唱酬頻謝韞王凝雅絕倫

謂陳栢
慈居士

文采

一門傳韻事才名不減管夫人

奔陋如予百不諳塗鴉自笑苦禁耽步塵聊賦停
雲句寄語東風示指南

